

宋

會

要

水利下

紹興三十二年二月二十七日詔令臨安府自浙  
江清水閘橫河口西曲盡頭南至龍山閘一帶河道並  
令開濶 馬瑞臨通考紹興元年詔宣州平太州守臣

修圩議修圩官賞罰又詔修圩錢未及資民種糧並於  
宣州常平義倉米內撥借詔建康新豐圩租米歲以三  
萬石為額圩四至相去皆五六十里有田九百五十餘  
頃近歲墾田不及三分之一至是始立額 紹興五年  
春二月寶文閣侍制李光言明越之境皆有陂湖大抵  
湖高于田田又高於江海旱則放湖水灌田澇則決田  
水入海故不為災本朝慶厯嘉祐間始有盜湖為田者  
三司使切責漕臣甚嚴政和以來創為應奉始廢湖為  
田自是兩州之民歲被水旱之患士子歲嘗取會稽餘  
姚上虞兩邑利害自廢湖以來每縣所得租課不過數  
千斛而所失民田常賦動以萬計遂先罷兩邑湖田其

會稽之鑑湖鄞之廣德湖蕭山之湘湖等處尚多望詔  
漕臣訪問應明越湖田盡行廢罷吳江東西圩田蘇秀  
團田折遍下諸路監司守令條上詔諸路漕臣躬親相  
度以聞於朝紹興二十三年正月詔以永豐圩賜秦檜  
檜死圩復歸有司諫議大夫史才言浙西民田最廣而  
平時無甚害者太湖之利也近年瀕湖之地多為軍下  
侵據累土增高長堤彌望名曰埧田旱則據之以灌而  
民田不沾其利水利遠近泛濫不得入湖而民田蓋沒  
望詔有司究治盡復太湖舊跡使軍民各安田疇均利  
從之按圩田湖田多起于政和以來其在湖間者隸應  
奉局其在江東者蔡京秦檜相繼得之大概今之田首

之湖徒知湖中之水可涸而為田而不知湖外之田將  
脣而為水也主其事者皆近倖權臣是以委鄰為埜利  
已困民皆不復問涑水既聞言王介甫欲興水利有獻  
言欲涸梁山泊可得良田萬頃者介甫然其說復以為  
恐無貯水之地劉貢甫言在其旁別穿一梁山泊則可  
以貯之矣介甫笑而止當時以為戲談今觀建康之永  
豐圩明越之湖田大率即涸梁山泊之策也沙田蘆場  
紹興二十八年詔戶部員外郎莫濛同浙西江東淮南  
漕臣趙子瀟鄧根孫蓋檢視逐路沙田蘆場先是言者  
謂江淮間沙田蘆場為人冒占歲失官課至多故以命  
濛等既而侍御史葉義問等言貧民受害乃詔沙田蘆

場止為世家詭名冒占其三等以下戶勿一例根括尋  
詔官戶十頃民戶二十頃以上並增租餘如舊置提領  
官田所領之不隸戶部 二十九年詔盡罷所增租

孝宗隆興元年知紹興府吳芾乞浚會稽山陰諸墜諸  
縣舊湖以復利水及等蕭山縣海塘以限鹹潮從之又  
開掘鑑湖 乾道元年詔令淮西總領所撥付建康中  
收到子粒令項椿管非詔旨無得擅用臣僚言秦檜既  
得永豐圩竭江東漕計修築堤埭自此水惠及于宣池  
太平建康昨據總領所申通管田七百三十頃共理租  
二十一萬一千餘秤當年所收纔及其半次年僅收十  
五之一倣令歲收盡及元數不過未二萬餘石而四州

歲有水患所失民租何翅十倍已下江東轉運司相度  
本圩始害民者廣之依浙西例開掘及免租戶積欠從  
之江東轉運司奏水豐圩自政和五年圍湖成田今五  
十餘載橫截水勢每遇泛漲衝決民圩為害非細雖民  
田千頃自開修今至可耕者止四百頃而損害數民田  
失稅數倍欲將永豐圩廢掘潴水其在側民圩不碍水  
道者如舊詔從之其後漕臣韓元吉言此圩初是百姓  
請佃後以賜蔡京又賜韓世忠又賜秦檜既撥隸行宮  
今隸總所五十家年間皆權臣大將之家又在御府其管  
莊多武夫健卒欺誦小民甚者剽掠舟船囊橐盜賊鄉  
民病之非圩田能病民也於是開掘之命遂寢 乾道

元疑道

二年詔漕臣王炎相視開掘瀾西勢家新園田謂草蕩  
荷蕩菱蕩及陂湖溪港岸際築塔畦園農耕種者所至  
令守倅縣令同共措置 五年知明州張津奏乞開東  
錢湖瀦水灌田從之 七年四川宣撫使王炎奏開興  
元府山河堰溉南鄭褒城四百九十三萬三千畝有奇  
詔獎諭 乾元九年詔戶部侍郎葉衡覈寔寧國府太  
平州圩岸五月衡言寧國府惠民化成舊圩四十餘里  
新增築九里餘太平州黃州鎮福定圩周廻四十餘里  
延福等五十四圩周廻一百五十餘里包圍諸圩在內  
蕪湖縣圩岸大小不等周廻總約二百九十餘里通當  
塗圩岸共約四百八十餘里並皆高闊壯實瀕水一岸



種植榆柳足捍風濤詢之農民實為永利於是詔獎諭知寧國府汪得言他圩無大害惟童圩最為害民只決此圩水勢且順從之湖田圍田陂塘總水利淳熙二年淮東總領錢良臣奏修復鎮江府練湖凡七十二源灌田百餘萬畝從之三年監察御史傅淇奏近臣僚奏陳圍田湮塞水道之害陛下復令監司守臣禁止圍畧此乃拔本塞源之要術然豪右之家未有無所憑依而肆意築圍者開湖西諸縣江湖草塘計畝納錢利其所入給據付之望條約諸縣毋得給據興官民戶及寺觀上曰此乃侵占之地今絕其源後去無復此患可令漕司常平司察之

食貨志

孝宗紹興三十二年

未改十一月二十九日參知政事督視湖北京西路軍

馬汪澈言相視襄陽有二渠一曰長渠一曰水渠皆古  
來水利播殖去處人約長渠溉田七千頃水渠溉田三  
千頃其間陂池灌注脉絡交通土皆膏腴自兵火後志  
已堙廢嘗差委湖北運判呂擢京西運判姚岳親至其  
地計度今且先治長渠凡築堰開渠可用二萬工并合  
要牛具種糧等就委兩路運司措置不令絲毫擾民長  
渠纔成或募民之在邊者或取軍中之老弱者雜耕其  
中來秋穀穀量度收租以充軍儲既省饋運又可安集  
流亡乞以措置京西營田司為名令姚岳兼領從之其  
後乾道九年十二月二十三日權京西路轉運判官吳

仰復言長木二渠之利數內靈溪水見流白馬堰係鄂州都統制司營田莊水亦通惟是白馬陂以東石子山木眼山合渠去處類多損壞日復一日必皆湮塞今若隨宜興修可以立見成效欲望下荆鄂都統制司令同本司差官行視二渠隨宜開通詔戶兵工部看詳各部欲下鄂州都統制京西安撫轉運司襄陽府同共疾速相度施行從之 隆興元年四月十二日詔浙西路轉運常平司取見今逐州人戶創立墾埤包圍成田及漁戶廣施漁具壅遏水勢去處疾速相度措置施行仍令州縣常切督責巡尉每歲于農隙時修治堤防無使缺壞及春夏之交部集人戶於河道淤塞要害之處併工

開撩常令水路通快從殿中御史胡沂請也六月十二日工部尚書兼侍讀張闡等言竊見近降指揮將紹興府鑑湖田明州廣德湖田盡賣二湖元灌溉民田浩瀚後緣民間侵種遂作圩田今若一槩出賣竊恐於民間別有所妨如紹興府鑑湖曾立石碑應深溝大港並永遠存留以充灌溉今欲乞專委紹興府明州守臣討論利害詣寔方可出賣從之 二年八月五日詔浙江水利久不講修積雨無所鍾洩重為秋稼之害可令逐州守臣考按古跡及見今淤塞去處條具措置聞奏九月四日集英殿修撰知宣州許尹奏本州有童圩寔係初興委是堙塞水流去處今欲依舊開決作湖以為民利

詔令本路轉運司相度如有壅塞候秋收後措置開決  
十二日詔江東浙西監司郡守朕嗣服以來求民之瘼  
比緣江東浙右俱被水災思拯民於愁歎寤寐不忘鄉  
等既分外臺之寄皆為共理之良宜究乃心各揚爾職  
能于所部講明田事預為陂塘築堰防患未然使甄効  
著于將來者朕當不次親擢其或但為文具尚畏權勢  
無益於備患徒擾於庶民固有典刑朕必不赦 乾道  
元年正月十四日知徽州呂廣問條奏農田水利諸塘  
竭合輪知首之人充雖田少不該亦均給水利不得阻  
障若鄉例私約輪充於官簿內開說充知首人盡賣田  
業新得產家雖合充止輪當末名不得越次仍批官簿

照會諸塘塢係衆利害蓄水救田本縣於農隙之時告  
示知首及同食水利人均備人夫併力修作塘塢下合  
承水利田產人戶典賣者並依資次承水如係買稅戶  
塘塢水亦申官江籍塘塢水上流既足如障塞公然占  
奪不從州縣約束者取旨形勢之家將新置田產却在  
舊塢之上占截水利似此去處縣官即時除拆若舊塢  
不容修築衆定利害務從民便若兩塢用水已足不放  
流者亦仰官司禁約塢塢兩岸或被水衝陷隔岸漲出  
沙田止許使水人承佃不得田鄰爭占塢塢所在合留  
水門若不妨阻舟船或擅毀拆並追勘斷約束未盡如  
別有私約並仰知首自陳添入若舊例已定不得創設

有合增事件並開官始許行用從之二月二十四日詔  
紹興府開濬鑑湖陰唐賀知章放生池舊界十八餘頃  
為放生池水面外其餘聽從民便逐時放水以舊耕種  
從知府趙令詠請也同日知平江府沈度言被畝開掘  
長州縣習義鄉清沼湖圍田一千八百三十九畝益地  
鄉高澤塘圍田一千五百畝蘇臺鄉元潭圍田一千五  
百八十八畝樊洪漾圍田三百三十二畝營田一千  
九百六十九畝費村漾圍田一千六百六十二畝崑山  
縣大虞浦圍田二十六畝小虞浦圍田一百六畝新洋  
江圍田一百七畝崑塘圍田三十三畝許塘田二十六  
畝六河塘圍田一十三畝常熟縣梅里塘圍田二畝白

茆浦園田二百三十一畝自今通泄水勢詔浙西提刑  
曾遠親至其地審實開具洩水通快可以經久無湮塞  
去處保明以聞 二年四月七日吏部侍郎陳之茂言  
比年以來泄水之道既多湮塞重以豪戶有力之家以  
平時潴水之處堅築塹岸包廣田畝彌望綿亘不可數  
計中下田疇易成泛溢歲歲為害民力重困數年之後  
凡潴為陂澤盡變為阡陌而水患恐不止今日也乞選  
差彊明郎官一員問漕臣將日下新園之田疾速開鑿  
上曰聞浙西自園田即有水患前此屢有人理會竟為  
權要所梗卿等可檢點累降指揮已曾如何施行仍委  
兩浙運副王炎疾速相視利害以聞既而王炎言相視



園田內有張子蓋新舊園田九十餘畝占籍兩縣埋塞水勢以患為民患躬至其地地名四塘周迴約二十里開掘已盡泄水通快地名長安周圍約四十里見督縣官併工開掘之戒勵張子蓋等家再犯重宜典憲已開掘去處各立剗記餘州縣依此從之五月十一日尚書省言浙西園田有壅塞水勢去處近專遣漕臣親詣逐州縣監督開掘以泄積水除民民害尚慮形勢權要之家日後依前冒法謀利復行修築為害如初理宜約束令兩浙轉運司并遂州縣守令常切檢察遵守如有違犯之人命官取旨餘重作施行六月一日臣僚言江陰軍在浙西最為地勢卑下雖瀕大江而歲苦水患尤甚於

他州蓋常州之水其勢趨下蓋自五瀉堰分流入石頭  
港黃港夏港蔡申港達于大江而江潮直至堰下歲久  
潮泥淤塞河港水既不能輸泄漫入田間而申港一河  
連接數鄉所繫尤重又有三山與秦望山山脚之下石  
自港內橫絕而過壅遏水道今所謂大石堰小石堰者  
是也一屬常州一屬江陰其石凡年漸高大河水為之  
不流數鄉無歲不被害田畝常在水底而常州境內河  
港水勢又不能泄實為兩郡之害若非朝廷措置開掘  
以兩郡之力必不能辦乞詔有司下本路監司兩郡守  
臣同力相度利害詔工部行下轉運司同常州府江陰  
軍相度措置以聞候農隙日興工開掘十五日臣僚言

浙西圍田壅塞水勢已行開掘竊見永豐圩自政和五年圍湖成田經今五十餘年橫截水勢不容通泄圩為害非細今相度欲將永豐圩廢掘依舊為蓄水之地詔依候至十一月開掘後復詔仍舊不開十月十四日利州路提點刑

獄公事張德遠言興元府褒城縣山河六堰灌溉褒城南鄭兩縣田八萬餘畝內有光道枝一渠決壞年深民力不能興修下流闕水率多改種陸田今歲正月內判興元府吳璘親率將士代民修塞仍作徧偃勒回別渠棄水併入光道拔下流諸堰堅固前日陸種去處復為稻田其利甚博詔璘令學士院降詔獎諭三年五月十五日秘閣修撰前知衢州周操言宣城管下六縣惟

宣城南陵有圩田去處而宣圩田最多共計一百七十  
九所大率地本卑下人力矯揉以成田畝十年九潦常  
有水患議者多欲廢決梗塞水道之圩以全衆圩謂不  
當隱忍愛惜當決之圩使衆圩俱受其害臣於乾道元  
年十一月到任是時圩田再造巨浸童圩係是破壞之  
數人戶稱此圩委梗塞水道臣逐出榜曉諭且令權住  
一年興築若來年衆圩熟不遭水患遂可永久廢罷今  
已去彼隔歲乞將童圩徑行廢決所有養賢政和蓮湖  
三圩乞併賜行下委自守臣詢訪條具聞奏詔寧國府  
守臣相度利害以聞其後知寧國府汪澈言童圩最為  
民害一水自徽州績溪縣本府寧國縣合諸水至童圩

一水自廣德軍建平縣合本府宣城縣南湖之水至童  
圩二水奔衝併來其勢浩渺所以向上諸圩悉遭巨浸  
又嘗考此圩本童家湖容流衆水非古來圩額今若將  
童圩廢決則水勢自然順適其餘未可輕議從之 四  
年五月二十四日詔知彭州梁介自到任講究農田水  
利經畫修築本州九隴等三縣十餘堰灌漑民田固護  
水勢委是利便可除直秘閣利州路轉運判官填見闕  
從四川安撫使虞允文請也八月七日觀文殿大學士  
知紹興府史浩言府內諸暨聚天台四明數百里重圍  
複嶺水出之源其流既廣止有錢清一江為吐泄之處  
古人於縣之四傍立湖七十二處以瀦蓄故無泛溢之

惠歲久所謂七十二湖者皆人占以為田故雨水霑足則水皆歸七十二湖所種之苗悉皆浸損然則非水為害民間不合以湖為田也今湖不可復則諸暨湖田為之民歲歲受害臣不敢以不告詔令史浩選委詣曉湖田利害官相度措置 七年十二月八日臣僚又言紹興府諸暨縣地接婺之浦江義烏眾溪輻湊與本縣諸山之水凡四十餘港合流而下境內舊有七十二湖可以滯蓄歲久湖變為田不惟水無所歸而溪港浸為漲沙埋塞田是以雨則有墊溺之患以晴則有旱暵之憂開鑿約用六十八萬一千五百工每工日給米二升計用米一萬三千六百三十碩詔令蔣芾相度九月二十

四日詔諸路提舉官自今興修水利若不依常平免役條令先選官按視許令興修只憑州縣保明虛撰農田水利酬賞輒為申奏不實者從戶部按劾取旨本部人吏不照應條法疏難輒便依隨偽妄聞報推賞者亦科違制之罪十月二十六日臣僚言紹興府諸縣各有湖湖高於田築塍岸豬水以備旱其田高於江置斗門洩水以備潦故雖或水旱而有備歲可使之常豐蕭山縣管下湘湖灌溉九鄉民田夏秋之交多闕雨澤決其湖以灌田禾稼滋茂近聞百姓將湘湖填築以為田寔害灌溉欲乞令紹興府差官看視若委是將湘湖為田則令開掘復以為湖依舊灌溉民田從之五年三月二

十日大理正措置兩淮官田徐子寅言兩淮荒蕪之田  
一目百里究其十分之地陸田總三四而水田居其五  
六春夏之交霖雨之久耕耨之勞秧蒔之功一旦空然  
此田之所以為民病也自去冬歸正頭目人差擇到楚  
州山陽縣大溪村博田岡空閑官田約數百餘頃南有  
灌溝可通運河北有舊溝可接小溪今欲由其舊跡與  
之開浚約用五百工歸正人各欲俟墾種畢日併力開  
浚從之 六年閏五月一日知雷州戴之邵言管下瀕  
海土薄地雜泥沙東北接連有大塘一所臣於農隙雇  
募夫丁併力開築竊慮歲久官司不能相繼增修旋致  
堰塞今後差注本州海康遂溪兩縣並令於官御上帶



主簿河渠公事任滿有無增修損壞批上印紙從之七日徽猷閣侍制新知寧國府姜說言寧國府太平州兩郡惟仰圩田得以供輸今來夏雨頻多竊慮縣官減裂民心不齊失於修治大為圩田之害欲選委清彊官同本縣通行檢視修護從之六月二十二日徽猷閣侍制知寧國府姜說言宣城縣南陵圩田既壞有不曾決破圩田九所欲於今冬自十月措置修圩以係官錢未募民興工俟今秋八九月措置以聞從之其後說措置修濟陽圩岸兼開決除廢在外詔從餘州軍圩岸損壞准此九月二十八日新知泉州周樞言太平州所管圩田每遇水災除壞除大圩官為興修外其他圩並係食利

之戶保借官米自行修治就令冬十月內措置亡委自  
各州守臣照紹興二十三年例從實措置施行詔應有  
圩田合修治處仰遂州守臣精加檢實及工役合用錢  
米支費具數限一月間奏十月二十三日知寧國府姜  
說言焦村私圩梗塞水面致化成患民圩頻有損壞合  
將焦村圩廢決其化成惠民兩圩南元有梗岸接焦村  
圩合依舊增高修築從之十二月十四日盛行在都進  
奏院李結言蘇湖常秀所產為兩浙之最自紹興十三  
年以來屢被水害議者皆歸積水不決之故以為積水  
既去低田自歉第以工役浩繁事皆中輟臣有管見治  
田利便三議一曰敦本二曰協力三曰因時司農陳郊

曹議云古人使塘浦闊深者蓋欲取土以為堤岸非專為決積水若堤岸高厚借令大水之年江湖之水高於民田五七尺而堤岸尚出於塘浦三五尺故雖大水不能入於民田民田既不吞水則塘浦之水自高於江而江之水亦高於海不須決泄而水自湍流矣此古人治低田之法也若知決水而不知治田則所浚之地不過積土於兩岸之側霖雨蕩滌復入塘浦不五七年填淤如舊前功盡棄為今之務莫若專務治田乞詔監司守令相視蘇湖常秀諸州水田塘浦緊切去處發常平義倉錢米隨地多寡量行借貸與田主之家令就此農隙作堰車水開浚塘浦取土修築兩邊田岸立定丈尺眾

戶相與併力官司督以必成且民間築岸所患無土今  
既開浚塘浦積土自多而又塘閘水深易以流泄田岸  
既成水害自去此臣所謂敦本之義也結又以為百姓  
非不知築堤固田之利然而不能者或因貧富同段而  
出不齊或因公私相吝而因循不治非協力不可百姓  
所鳩工力有限必賴官中補助官非因饑歎難以募民  
興役非因時不可詔李結所陳緣所費浩大令胡堅常  
相度措置胡堅常看詳李結所議誠為允當今相度欲  
鑄板曉示民間有田之家各自依鄉原體例出備錢米  
與租佃之人更相勸諭監督修築田岸庶官無所損民  
不告勞詔從之 七年七月二十五日將作少監馬希

言奏被旨覆寔太平州修圩利病欲望委視有圩田州  
縣守令措置將圩內人戶推一名有心力田畝最高之  
人為圩長大圩兩人每遇秋成集本圩人夫於逐圩增  
修面闊一尺側厚一尺脚闊二尺須用堅土實築若圩  
內人力不足或闕工食官中量行添助如是五年不輟  
則圩勢高厚雖有湖潦不能侵也詔令逐州守臣措置  
希言又言乞再委三州軍守令應私圩未修去處以田  
畝十分為率借米一分今日下修葺仍令被水之圩更  
與給借糧種候秋穀分兩年剋納並須遍及四遠鄉村  
先以所管常平米支如不足轉運司就鄰近州縣取撥  
應副從之二月四日觀文殿學士知紹興紹蔣蒂言本

府會稽縣德政鄉有田萬二千畝七年被水細民殆無  
生意古有後浦在下流凡十里餘舊來深淺以泄裹水  
爰自損壞埋塞每遇溪流泛溢江湖壅大則滄浸旬日  
水不通泄一再挿種並無收成乞於本府常平錢借支  
二千緡義倉未借支三千斛就行賑濟因以開浦從之  
五月二十日詔太平州寧國府新修圩田可差監察御  
史陳舉善前去覆實開具有無堅壯損壞以聞七月十  
三日戶部尚書曾懷等言秀州華亭縣新涇塘合築堰  
置閘以捍鹹潮免侵民田事繫利害其所用工料錢五  
萬貫文省乞委浙西提舉常平官李結疾速興修從之  
後知秀州岳憲遂成之

詳見堤  
堰門

八年十一月臣僚言

寧國府兩圩梗岸雖已圓固至於卑窪去處可以瀦水者又須當求所以措畫之方惟相其水源所歸穿掘陂堤以瀦蓄之外水既落則回以決放而可以免於浸溺况兩圩腹內包裹私圩十五所其野泊荒陂低圩之田廢而不治者尚多有之圩知民其利而不能自辦官欲為之又無餘力可成惟其常有淹溺之憂而未免蠲減苗稅孰若以其所減者募民疏鑿欲望於苗租內截撥米若干碩責以農隙之時浚築將見永無水患不失賦入以濟大農之用詔江東常平司委官取見的實合修去處丈尺工料米數實具文狀保明以聞 九年八月十六日詔曰朕惟旱乾水溢之災堯湯盛時有不能免

民未告病者備先具也間者數年比不登江湖閩浙之人或荐告饑豈有肥饒人事之不齊乎將火耕水耨不得其時地有遺利乎抑賦役繁多或奪其力乎何種入之寡乏也深惟其故未燭厥理乃博延群臣訪問得失更有從南方來者言豫章諸郡縣亘阡陌近水者苗秀而實高仰之地雨不時至苗輒就槁意者水利不修失所以為旱備乎唐園丹為江西觀察使治陂塘五百九十八所灌田萬二千頃此特施之一道其利如此矧天下至廣也農為生之本也泉流灌溉所以毓五穀也今諸道名山川原甚衆民未知其利然則通溝瀆豬陂澤監司守令顧非其職歟其為朕相丘陵原隰之宜勉農功



盡地利平糴行水勿使失時雖年有豐凶而力田者不  
至拱手受弊亦天人相因之理也朕將即吏勤惰行殿  
最而寓賞罰各殫厥心無蹈後悔九月二十七日度支  
員外郎朱儵言江東圩田為利甚大其所慮者水患而  
已知增築埭岸以固隄防為急而不知廢決隘塞以緩  
奔衝之勢乞下江東轉運常平司更切講究本路圩田  
別有似此隘塞水道合從廢決去處與逐州守臣公共  
詳酌奏請施行從之 九年十一月二十五日詔令諸  
路州縣將所隸公私陂塘川澤之數開具申報本路常  
平司籍定專一督責縣丞以有民田戶等第高下分布  
工力結甲置籍於農隙日浚治疏導務要廣行瀦蓄水

利可以公共灌溉田畝如無縣丞處即責以次縣官依此措置候歲終令本州恭酌將工力最多去處保明申常平司差官覈實申朝廷推賞其怠慢不職之人按刻取旨責罰從臣僚請也十二月二日龍圖閣侍制知太平州胡元質言今歲遭值大水除政和等十三圩不曾遭風水餘諸圩幾四百里為水漫沫而入內外灌浸風浪洶洗經涉三時其受害損壞不一合隨其所損而為之計其洗動處則重築其坍塌處則補築其虧狹處則貼築其不損壞處則補築其虧狹處則貼築其不損壞處則又為之增築其工費計米二萬一千七百五十七碩五升錢二萬三千五百七十貫一百三十七文省比

隆興二年乾道六年所省幾半務趁山冬土脉堅實之  
時及期辦集從之以上乾道會要

方域志壽皇帝聖隆興元年十一月二十四日  
知紹興府吳芾言鑑湖之廣周回三百五十有八里環

山三十六源之利注流其中自漢永和五年會稽太守  
馬臻為之溉會稽山陰縣之田九千餘頃至於國初八  
百餘年民受其利歲月寢遠濬治不時日以埋廢瀕湖  
之民侵耕為田熙寧間盜而田者九百餘頃朝廷嘗委  
前廬州觀察推官江衍經度其宜凡為田者兩存之乃  
立石碑為界內者為田外者為湖申嚴約束政和末為  
郡守者務為應奉之計遂建議廢湖為田賦輸入于京  
師自是姦民私占無所忌憚江衍所立石碑之外為田  
者又一百六十五頃七畝有奇而湖湮廢盡矣今欲開  
鑿合用工四百九十萬七千九百餘欲望申嚴約束今  
後每於農隙接續興工仍乞勅旨本路提舉常平官并

本府守臣各兼提舉開湖道判令丞簿各兼主管開湖  
庶得上下協力昔錢氏以臨安府西湖有灌田之利嘗  
專置撩湖兵士十人以為便今欲移壯城一百人備撩  
澆浚治之役許本府別差強幹大小使臣一員以巡轄  
鑑湖堤岸為名從之其後蒞任刑部侍郎復奏自開鑑  
湖溉廢田一百七十頃復湖之舊又修治斗門堰閘十  
三所夏秋以未時雨雖多亦無泛濫之患民田九千餘  
頃悉獲倍收其為利較然可見勘會旁近低田不過二  
萬畝欲從官司量給其直之半而盡廢田其將江衍元  
立禁碑別定界止則堤岸自然永無盜決之虞從之  
二年八月六日臣僚言大江之南海濱有三十六浦漫

浙西陂湖之水入於海浙西因無水患近歲浦港淤塞甚多且有力之家圍田支閘紹興二十八年朝廷差趙子瀟措置開濬未及興工改用任古比子瀟所計十減八九議者非之今歲果然三十六浦實有四等如葛涇下張崔黃四七了浦掘浦溪浦金涇八所為最要如六金鶴楊浦千步涇甘草六河高浦司馬浦東浦及其九所次也如浪港參浦五嶽川沙碩遙野兒西陳水門塘浦黃鶯馱涇九浦唐浦石幢郎溝北浦十六所又其次也如白茆福山許浦三所不大淤塞欲望睿旨選官先次商浙西水勢將三十六浦擇要切處科計工役盡理開濬諸諸州守臣考按古迹及條具埋塞河港以聞其後

兩浙路轉運判官陳彌作言奉旨平江府躬至常熟崑山兩縣考利病常熟之浦二十有四皆北入于江崑山之浦十有二東入于海蓋以太湖震澤居其上流昔人患松江之不能勝欲使衆流注得其歸故也諸浦之興始於天禧成於景祐建政和間稍已堙廢夫儲水則今之塘湖是也瀉水則今諸浦是也識者皆知開浦之利不但今日特以工費甚廣不敢輕議今若併舉大役慮歛歲民無餘力官無羨儲及致勞擾擇其宜先者九十浦而其緩急又半之興工之月仍乞以緩急為先後之序常熟縣最要二浦曰許浦曰白茆浦總計工役為錢十萬五千三百四十八緡米四萬五千四百四十六石



次二浦曰崔浦黃泗浦總計工役為錢七萬六千六百八十二緡米二萬三千三百四石崑山縣最要三浦蓋注下張七了浦計共工役為錢七萬一千四百七十二緡米二萬一千四百四十一石次三浦川沙楊林極浦總計工役為錢二萬二千二百緡米六千六百六十石詔平江府守臣沈度覈實如委當開掘即具省減工料開奏同日權發遣常州劉唐稽言本州申利二港上自運河發流經營回復至下流折為二道一自利港一自申港以達于江緣江口每日潮汐帶沙填壅上流淤泥澄積流淺不通而申港又以江陰軍釘立標揭拘欄稅船每潮則泥沙為木標所壅淤塞益甚今若相度開此

二河但下流中利而港並隸江陰軍若議定深濶丈尺各於本界開濶庶協力皆辦又孟瀆一港在奔牛鎮西唐孟簡所下並宜與縣界沿湖舊有百瀆皆通宜與之水籍以疏洩近歲阻於吳江石塘流行不快而沿湖河港所謂百瀆存者無幾今若開道委為公私之便本路憲臣葉謙亨相視先具利害以聞其後亨謙言港水與民田漫沒不分俟水退計度詔憲臣曾建兩月措置開濬事有未便條奏至乾道二年八月漕臣姜說等始議措置欲於來年移造蔡涇開港工物次年春初地脉開凍之時先開申港其說謂上流橫河有三山橫石妨礙洩水須先開鑿日役民夫七千度至三月上旬畢工更

乞休役一年再於次年開濬利港合用民夫乞下常州  
江陰軍兩郡均募詔江陰軍常州蔡注開及申港來年  
春興功利港更休役一年明年四月修申港成官吏第  
賞有差十月二十日直敷閣權發遣臨安府黃仁榮言  
餘杭南北兩湖綿亘二千餘里頃年以創置馬監洪水  
暴漲泥土沙石函湧入湖遂致湧塞於積水無所歸乞  
將馬監撥歸南塘可以施工修治詔馬監撥南蕩就委  
仁榮措置仁榮措置兩湖東舊有五畝畦計七十二丈  
以殺水勢不致衝突久廢不修今鄉自備椿蔕修治兩  
湖北中隔塘約四里隔護湖水免入縣市浸損民屋即  
今塘岸損漏欲候農隙日興工馬監元買田地一千六

百五十九畝並兩湖地七千九百四畝漲泥堙塞已勸  
諭鄉民候農力辦日於湖內任便取土興修濬治從之  
乾道元年正月十四日敷文閣待制知建康府張孝祥  
言溧水縣銀林皇東填約陸行十五餘里中隔五堰東  
通溧陽宜興兩縣入太湖古道尚存歷歷可考按圖經  
云昔吳王伐楚以伍相舉兵因開此瀆以通漕運此道  
堙塞久矣宣和間嘗委發運司同本府審度利害議者  
以謂東西湖水高低不等若開此河西湖之水流入東  
湖則蘇常被害又云土石堅硬不通鑿開是時頗疑此說  
遂即舊河開井丈餘探知工力可以穿鑿即會計賞糧  
方欲興工偶靖康多事因而止後今宣和間所開土井

尚存則土石堅硬之說已不然矣此河從古有之既入太湖當自松江順流入海則蘇常被害之說亦未為得紹興以來朝廷屢委本路漕司相度利害村民往往悍於興作加其地多以車脚往來牙僧所得甚厚使舟船通行即黨輩失利故立異說以惑亂上下况銀林至東埧每春水泛漲舊河亦可通百料之舟方今駐蹕錢塘若此河可開不唯川廣荆湖江淮諸路綱運減省水脚且免涉大江數百里風濤寇盜之患詔令汪徹依張孝祥所具便宜限半月措定以聞其後徹移通判張維行視維言若開五堰恐大江泛濫無以禦之蘇常受害奏聞遂寢同日敷文閣待制知張孝祥言奉詔案視溝瀆

古迹考按圖經秦淮水三源一自華山由句容一自廬山由溧陽一自溧水至赤山湖至府城東南合而為一溧回潦繞綿亘二百餘里溪港溝澮之水盡歸焉水流上水門由府城入大江舊上下水門展闊自兵火後砌壘稍狹雖便於一時防守寔遏水源流通不快兼兩岸居民填築河岸添造屋宇日漸侵占其岸白地利入公庫若本府免收仍諭居民不許侵占秦淮既復古道則水不泛漲矣又府城東南號陳二渡有順聖河正分秦淮之水每遇春夏天雨連綿上源奔湧則分一派之水自南門一直入江故秦淮無泛濫之患今一半淤塞為田水流不通河勢雖存寔不通澈若不惜數畝之田疏

導之以復古迹其利尤倍詔帥臣汪徹指定以聞徹代  
孝祥故命焉其後徹言水潦之害大抵緣建康地勢稍  
抵秦淮既泛又大江湍漲其勢溢溢非由水門砌壘窄  
狹及居民侵墓所致秦淮分三派一入城中入下水門  
入江一抱北流為壕一抱城南流為壕入江入城中者  
即由上水門其砌壘處正不可闊闊則水入城益多狹  
則有以殺其勢而分歸兩壕臣今指定上下水門砌壘  
處不動夾河居民之屋亦不毀除去兩岸積壤使河  
流快所謂陳二渡順聖河乃程二渡也訛而為陳相近  
者有二河之迹一名順營河一名石溝河自東南至城  
角伏通樓下與城濠相就直入江疑古有此莫究埋塞

年代順勞勢難鑿惟石溝勢快可以下工其河約六  
里見為民田今指定欲自程二渡開復石溝一河就伏  
龜樓下南城壕可使秦淮水勢不至大入城中臣又慮  
其地係行宮東南旺方不宜開鑿從之三月六日知平  
江府沈度言兩浙運判陳彌作言崑山常熟界白茆等  
十浦相視疏濬先後之序約用工三百二十二萬七千  
三百有奇今體訪彼處耆老所開港浦並通澈大海遇  
潮即海內細砂隨泛以入潮退而砂泥澄陸設一舉開  
濬晝停夜積不數年以舊填淤今若依舊招置閘額開  
江兵卒常戢崑山每縣各一百人仍於本府見管使臣  
內選差二員部轄相視緊緩見今淤塞之所次第開濬



通洩水勢不數月諸浦可以漸次通澈如慮潮水帶上  
砂泥停積即候徐來委遂縣措置官船於要緊浦內擺  
泊用開江兵卒駕船每遇潮退隨之搖舫常使砂泥隨  
潮退落不至停積實為久便從之 二年二月十九日  
和州言開鑿姚下河東接大江防捍敵人檢制盜賊最  
為右地輔臣以堙廢既久擅興非宜奏罷之三月十七  
日太平州言轄下東采石與和州楊林渡相直紹興三  
十一年金人犯江先自和州造船入楊林渡小河徑衝  
采石其為要害明甚今和州止為創收商稅皆徵小課  
息却將舊姚下河東接大江西至姚下市橋次曲尺至  
和州城下稍西北接連東河出大江欲初疏鑿達和州

城下直抵慈湖相對赤埭河口出大江通放舟船恐緩  
急賊船可以橐橐實難防禦詔以其事下淮西總領所  
轉運司其後遂司言楊林渡元係大江砂夾河水通行  
約三千四百餘步堙塞歲久若今開通可免逐年大江  
黃湧湧入姚下浸損圩埝兼砂夾自今淤澱人馬可以  
直過別無限隔若開通河道緩急之際江北百姓牛馬  
等可渡先砂上次第濟渡過江其砂上亦可儲蓄糧草軍  
民兩利詔和州將朱開步數許行開掘六月二十三日  
權兩浙路計度轉運副使姜詵言華亭縣躡港顧永澹  
大沈汪小沈汪新漕汪銚港東沈汪沅家港龍泉港十  
所與柘湖相通入海後以潮砂淤塞港口今相度令秀

州從宜開濬常熟縣黃泗浦崔浦許浦白茅浦亦以潮  
沙所埋浦口淺狹開鑿合用二百二十九萬三百餘工  
最要許浦浦口東南至白蕩橋黃浦自黃  
沙港至塘河橋其次崔浦自丁涇塘至浦口黃沙浦自十  
字港至溪浦詔本路漕臣躬詣相視仍令逐州守臣專  
委令丞計度開掘中尚書省其後說復言過往相視提  
鄉土父老等合辭言瀕海諸浦官司難以盡開衆議許  
浦最要今先開濬及自推浦口開至梅里直達紫鸞則  
積水可徑泄入楊子江與諸浦以次開浚詔別議施行  
三年十一月十五日紹興府言轄下蕭山縣西興鎮通  
江兩閘近年為江沙壅塞舟楫不通募人自西興至大

江疏成沙河二十里并開浚閘裏運河十三里通便網  
運民旅皆利既通之後復恐潮水不定仍有填淤之患  
并本府通江六堰網運至多謂宜措置為經久便利欲  
乞於本府合差注指使員數差一員以專開撩西興沙  
河繫銜庶永遠為一方舟楫之利本府竊管捍江兵士  
二百人今欲撥差五十名專充開撩沙浦不得泛雜差  
使仍從本府措置起立管屋居止遇有微小折毀處即  
時開撩歷常令通濟鍵之 四年十二月二十六日臣  
僚言蕭山縣民裴詠等屢經御史臺訴百姓汪彥等將  
湘湖為田千餘畝以獻總管李顯忠若果以湘湖為田  
侵漁不已湖當盡廢湖廢則九鄉萬衆之產一遇旱乾

何以灌溉苗即就槁欲乞令紹興府差官行視若委以  
湘湖為田則給民復以為湖非湘湖則勿問從之 五  
年二月七日權發遣臨安府周宗言西湖水面惟務深  
闊不容填溢并引入城內諸井一城汲用尤在涓潔今  
相度欲增置撩湖軍兵以百人為額專委錢塘縣尉並  
壕塞官一員於街內帶主管看湖專一管轄軍兵開撩  
仍乞除德壽宮外自今並不許有力之家種植菱芡及  
因而包占增疊堤岸或有違戾依蘇軾任內申請以違  
制論從之九月六日權知明州張津言轄下東錢湖容  
受七十二溪方圓廣闊八百頃傍山為固疊石為塘合  
八十里自唐天寶三年縣令南金開廣之皇朝天禧元

年郡守李夷唐重修之中有四閘七堰凡遇旱涸開閘放水灌溉七鄉民田計五十四萬畝雖甚亢旱亦無災傷昨因豪民於湖塘淺岸漸次包占種植茭荷障塞湖水紹興十八年雖曾檢舉約束盡罷請佃歲久茭根蔓延淤塞水脉致妨蓄水蕪塘岸間有低塌去處若不開淘修築不惟侵失水利兼恐塘埂相繼摧毀欲望下本州候農隙之際趁時開鑿因得土修治埂岸寔為兩便從之其後本州言行視湖濱緣所用丁夫浩瀚見楮錢采珠闕不知竊見東錢湖自有湖以來到今雖遇大旱不闕灌溉自前雖時復野生茭草諸鄉百姓至二三月間便採割貨賣飼食耕牛近年因兩寨水軍牧馬盡籠

有之刈割失時以致根蔓積爲厚蘗今若依舊許百姓  
二三月間芟草發生之時任便採刈八九月以後無用  
水之時縱乾湖水今百姓收放踐踏即芟蘗逐軍自壞  
經久淨盡官中可無大費誠爲便利魚環湖皆出倚山  
爲岸岸非山處殆不能半外民田率低下雨澤稍多湖  
面漲溢報時決放至今諸堰有所謂則水石者言水過  
此則須開閘破堰放泄湖水可以見岸下足以儲蓄今  
欲度量將所橋錢米先修堤防堤防既高水自瀦蓄水  
勢既深雖芟蘗未除亦不爲害詔開東錢湖前旨不行  
所橋錢米令本州修築堤岸 七年七月二十四日詔  
兩浙漕臣沈度專一措置修築練湖先是臣僚上言鎮

江府丹陽練湖按圖經幅員四十里納長山諸水漕運  
資之故古語云湖水寸渠水尺在唐時法禁甚嚴盜決  
者罪比殺人本朝猶踵其法爾後浸緩其禁以惠民然  
修築嚴甚春夏多雨之際儲蓄盈滿夏秋雖無雨漕渠  
或淺但泄湖水一寸則為河一尺矣故夾岡亦未始有  
膠舟之患公私兩便焉兵火以後多廢不治堤岸圯缺  
春夏不能貯水強家因而專利耕以為田歲月既久其  
害滋廣官司維時稱開濬浦築筏為文具而已侵耕浸  
多加以淤澱夏秋乏雨之際視湖如掌啓板至十餘纜  
能泄入河猶不能大有所濟况民田邪由此公私兩病  
矣伏望特降睿旨令本路轉運若提舉官日下與府縣



長吏躬親相視按塘興國初之舊於貯水委有利害必嘗開掘者若干公心詳度利害檢計工料保明以聞然後遣一郎官或御史復案之候農隙興工務使易成而難毀仍參酌中制立為盜決侵耕之法著于令責長吏以奉行必定庶幾練湖漸復其舊民田獲灌溉之利漕渠無淺涸之患 七年九月十一日權發遣秀州岳密言華亭縣地勢南北高仰其鄉呂父老皆稱或遇水滂本縣西北有長泖接連澱山湖趙屯浦鹹魚港出大盈浦趣吳松江入大海縣北亦有通波塘嵩塘郭巷汪趣艾祈浦通吳松江亦入大海縣東北又有北俞塘黃浦塘蟠龍塘通接吳松大江皆泄裏河水滂內北俞塘見

今淤塞已委官相視開撩竊詳蘇湖州積水湖州自震澤太湖泄入吳松江平江府自練湖入白覲江泄入吳松江並歸大海止緣兩州之人不知地勢所以累訴官司信之累命決水於二州初無利便反均被鹹潮之患

密興修本州汪塘堰條奏水利因及之

十月十三日兩浙路計度轉運副

使沈度言被旨置修築練湖相視上下兩浙石碇三座舊有啓閉閘板歲久板木不存因此走泄內橫填石碇係縱水歸下湖今已衝損及姚婆石碇最為切要走水尤多欲依舊置閘板啓閉監督添用椿木隨閘板高下填築固護及南北斗門損漏一切各已整治竊觀上湖地形比下湖高仰西向地形石碇之側有數丈槓關比

之東向其岸稍低兩湖草地灘脚若濬治近岸即就土  
可以增堤高固湖身復依古者作上峯就湖堆積如此  
則蓄水必多不獨以通利網運亦以灌溉民田從之

八年六月二日直敷文閣權發遣西路兩浙提點刑獄  
公事提舉河渠公事王淮言竊見姑蘇號曰平江言江  
流至此而平也平則勢緩緩則易壅非泄而入海則不  
能無潦水之患書言三江既入震澤底定臣嘗考三江  
入海之由不可詳據姑以耳目所接鄰於海而易泄者  
惟秀之青龍港蘇之許浦白茆與夫琴川百家汪皆泄  
入海之道也今秀之青龍港固自若所不必論而蘇之  
百家汪琴川白茆或存或廢未可遽復惟常敷之許浦

流之最下者沙石填壅其淺者既夷而為平陸而其深者亦不過尋丈舟行則膠流集必過彙者朝廷嘗命憲臣相視而開導之工役既衆暫而遂止然法有不便於彼而於此甚便者事有不行於前而於茲為可行者惟因人之力而用之則役有因人之利而導之則樂從力半工倍莫甚於此且今之許浦水軍屯駐在焉連營列壘不下萬計誠於此時命主將以提其綱命縣王以佐其費秋冬之交防托之暇日率其卒伍公許浦一帶疏而通之浚而深之使江海之流相接而又立為犒賞隨所治之多寡為之等差則貪者先之懦者隨焉持久之效可旬日辦也豈惟浙西之民可無水潦之患亦彼屯

聖

駐者之利也其地利之遠近流委之曲折地勢之高卑  
經理之始末當命有司別條具焉惟冀陛下留神幸甚  
同日五兵即前權發遣鎮江府兵馬幹轄王徽言紹興  
二十八年開平江府常縣五浦時因積水泛溢欲泄  
八大江宜自常縣縣東開鑿至雒浦五十里入許浦縱  
水入江方為長利却自雒浦之西就民田創河二十五  
里號丁汪塘橫引水復入福山浦使二浦之水復歸一  
浦止近縣田稍獲灌溉他無補也且大江之南鎮江府  
以往地勢極高至常州地形漸低錢塘江之北臨安以  
往地勢尤高秀州及湖州地形極低而平江府居在最  
下之處使歲有一尺之水則湖州平江之田無高下皆

滿溢每歲夏潦秋漲安得無一尺之水平閘江灘海岸  
常列三十六浦各置巡檢寨捍江海浚治江浦通快上  
水故數十年前溯西不聞每歲被水今三十六浦最急  
者平江府五浦蓋平江府實為湖西衆水聚集之地就  
五浦之內黃泗浦之中大抵與福山逆流不用開鑿外  
崔浦許浦白茆漕三所潮沙壅積與岸齊平使千里之  
外不能流入大江之潮不能上通竊謂治水當導所受  
之處若使下流壅積不達江海雖鑿陂塘所及亦狹要  
使江壘海注注水如瀉然後百川之流漸有歸宿謹圖  
地形水利附奏詔光措置開鑿許浦條約以聞其後平  
江府守臣岳憲言開鑿許浦雖大水不無獲利然頃去

猶蓄過旱不無所病且大役難成其議遂止 九年十

一月二十三日臨安府言承御降文字竊惟西湖自蘇軾開鑿以後舊額合招蘇河兵士一百人駐於近湖之地歲輒開檢不使淤塞今六飛駐蹕所存止二十有五入况禁戢不嚴冒佃侵多故多葑茭蔓延西南一帶已成平陸而濱湖之民每以葑草圍裹種植荷花駸駸未已若不鋤治恐數十年之後西湖遂廢將如越之鑑湖不復可復欲望睿慈措置凡湖之荷蕩若閑慢不急之所許存留若居湖中有碍湖面一切芟除務令淨盡仍乞約束自後居民不得再有圍裹如違戾以違制論庶幾蓄有餘水而漕渠六井之湏雖遇旱歲可以無乏公

私兼濟實非小補從之其後臨安府守臣言一切芟除  
外西至顯明寺前北至四聖觀港湖東至王妃塔南至  
山脚種植菱芡蕩等並係良馬院主堂詔並令開榛



全唐文

宋會要 造水碓

真宗大中祥符八年四月命河北安撫副使賈宗相度定州北河興置水碓先是上封者言定州地有暖泉冬月不冰可以常用故使經度之仁宗天聖八年四月陝府西轉運司言秦州路歲造麴用麥教萬石止合於在州及近郊水碓戶分配變磨其就倉請領并納麴時頗多邀滯搔擾今據碓戶八十餘人狀願細撲官水碓五盤所收數納官只乞官自變磨應副知州張綸尋已施行兼綸差通判程貢於州界側近度地形安便處增脩水碓得永寧寺西官柳林中可修立水碓一悉不妨

占居民地土水利令并舊官礅應副中變磨合用麴麥  
外亦可量出租課添助軍須乞降敕處分從之 神宗  
熙寧六年五月六日詔諸初置水礅碾碓有妨灌溉民  
田者以違制論不以去官赦降原免官司吞縱準此  
元豐六年二月二十七日都提舉汴河堤岸司言丁字  
河水磨近為濬蔡河開斷水口妨開茶磨本司相度通  
津門外汴河去自盟河咫尺自盟河下流入淮於公私  
無害欲置水磨百般放退水入自盟河從之 哲宗紹  
聖元年八月二十三日詔興復水磨茶應合行事令戶  
部先具措置申尚書省 九月二十八日戶部言準敕  
復置水磨今踏逐到京索天源等河措置脩立從之仍

差右通直郎孫迥提舉 二年三月七日戶部言得旨

興修水磨茶事初元豐中都提舉汴河堤岸司總領即

便水流用之堤岸司令廢歸都水監而措置茶事乃隸

戶部事不相應請依元豐置都提舉汴河堤岸司故事

應一司事並依舊條詔就差提舉茶場水磨官兼提舉

汴河堤岸專管自洛至府界調節汴水應副茶磨不

得有妨東南漕運 四年十一月十一日戶部郎中提

舉水磨茶場孫迥言茶磨亡於在京東水門外汜汴河

兩岸逐舊日脩置水磨去處別行興復從之元符三年

十二月三日詔以都水使者魯君貺專切應副茶場水

磨 先是閩守勲李士京同領茶場欲推淮南茶盡鬻

之官歲當三百萬緡三省抑而不行至是三省因奏神  
宗本以抑奪都城十數兼并之家歲課至三十四萬緡  
逆賈種民遂增展及輔郡人以為病詔增展輔郡推茶  
指揮勿行止依元豐舊法徽宗崇寧二年二月二十  
三日提舉京城茶場所言紹聖初興復元豐水磨推  
京畿茶法歲收二十六萬餘緡四年於長葛鄭州等處  
京索漢水河增磨二百六十所借用汴水極為要便自  
輔郡推法之罷遂失其利今四磨不能給其元符三年  
罷輔郡推茶指揮乞勿行從之

全唐文

宋會要嘉定鎮江志

淳化元年二月詔廢潤州之京口呂城常州之望亭奔牛四堰秀州之杉木堰杭州之捍江清河長安三堰越州之山陰縣西堰天聖七年五月兩浙轉運使言潤州新河旱工降詔獎之三朝國史志慶歷三年潤州漕漕河成督功者賜詔嘉獎其後每年必乾淺輒阻漕舟虞部郎中胡淮與兩浙路提點刑獄元積中再經度常潤州河夾崗道置堰功費多而卒無補御史陳經言之淮及積中皆貶官係熙寧二年初武進尉陵民瞻建議廢呂城堰又即望亭堰置閘而知常州王說議開珥瀆

河通常潤運路朝廷以虞部郎中胡淮提舉民瞻督役積中總其事蓋積中主民瞻議故也 鄭向為兩浙轉運副使疏潤州蒜山漕河抵于江人便利之皇祐二年王琪再守潤轉運使欲大興役浚常潤二州漕河琪言方蠻蠻騷五嶺又南方歲比不登民困無聊不可重興此後詔罷之而後議者卒請廢呂城堰破古函管而浚之河反狹舟不得方行公私以為不便官吏率得罪去會要治平四年七月都水監言兩浙相度到潤州至常州界開淘運河廢置堰閘乞候今年住運開修夾岡河道從之 四朝國史志元祐四年知潤州林希復呂城堰置上下閘以時啓閉四朝史本傳曾孝蘊字處善公

亮從子紹聖中管幹發運司糴糴事建言楊之瓜州潤  
之京口常之奔牛宜易堰為閘以便漕運商賈役成公  
私便之 四朝國史志元符二年九月潤州京口常州  
奔牛渙閘畢工先是兩浙轉運判官曾孝蘊獻澳閘利  
害因命孝蘊提舉興修仍相度立啓閉日限之法至是  
始告成也 會要崇寧元年十二月一日中書省勘合左司  
尚書省員外郎曾孝蘊劄子紹聖間獻陳澳閘利害蒙朝廷今  
孝蘊提舉興修了當行運首尾四五年若不別令官司  
主管則已成東南漕運大利當遂廢革欲乞專差官一  
員自杭州至揚州瓜州澳閘通管常潤揚秀杭州新舊  
等閘依已降條貫專切提舉車水澳閘覺察應干姦弊

乞差舊曾監修澳閘宣德郎新知崑山縣事鮑朝懋提  
舉管幹依提舉弓箭手例序官請給人從舟船等事於  
蘇州置解宇以提舉淮浙澳閘司為名人吏許於常潤  
蘇杭秀等州選差半年一替仍令兩浙轉運司進奏官  
兼管發落文字從之政和六年八月御筆鎮江府旁臨  
揚子大江舟楫往來每遇風濤無港河容泊以故三年  
之間溺舟船凡五百餘艘人命當十倍其數甚可傷惻  
訪聞西有舊河可以避急歲久湮廢宜令發運司計度  
深行濬治以免沉溺之患委官處畫早令告功

嘉定鎮志

慶歷中於夾岡道置堰功費多而卒無補旋罷今地名



有黃泥塢者豈其地與按舊志夾岡地勢繁迴歧分山  
脊相距曠迴行者惴惴熊叔茂詩僻疑昏有虎靜怪曉  
無難謂此地也嘉定中郡守宇文紹彭創置六鋪撥邏  
卒守之舟行陸走藉以無恐混一以來成坦途

嘉定鎮江志

全唐文 堰

宋會要

曹城堰威州之保寧縣新修堰天禧二年三月修

宋會要

碓子堰

鳳州梁泉縣之碓子堰大中祥符二年置

宋會要

碓子堰

紹興二十三年五月十二日利州路安撫司機宜楊度言紹興府見屯御前軍馬合用糧料全籍糴買應副食用本府裒斜谷口有古六堰澆溉民田頃畝浩瀚自來春首隨食水戶田畝多寬均出夫力修葺昨經兵火民力不足多因夏月使水之際暴水衝損堰身逸失一歲

之利又撥屯內將兵差不入隊人兵併手修葺幾幾便  
民詔四川安撫制置司詳所陳事理施行

宋會要 水渰堵

紹興十一年四月二十三日兩浙轉運副使張叔獻等  
言華亭縣東南沈海西連太湖北接松江松江之北復  
控大海地形東南最高西北稍下柘湖十有八港正在  
其南故來築堰以禦鹹潮防趨下而北為民田之害

宋會要 水渰堵

乾道四年五月二十四日知樞密院事四川宣撫使虞  
允文言彭州九龍等三縣管都江等判等一十餘堰灌  
溉民田其堰身長七十餘里自紹興二十年以後州郡

不以真意遇雨水泛溢決壞堰身水利畧盡知縣梁介躬行堰所部勒丁夫修治堅密水脈通流田畝霑之溉及秀縣實為水利詔梁介直秘閣利縣路轉運判官

宋會要 汴河堰

皇祐二年閏十一月賜汴河治堰緡錢

宋會要 山河堰

乾道七年五月十二日參知政事四川宣撫使王炎言興元府山河堰灌  
溉甚廣世傳為漢蕭何所作嘉祐中提舉平常史昭奏上堰法獲降敕書  
刻石堰上至今遵守

宋會要 捍海堰

天聖六年七月淮南發運司與修泰州捍海堰畢工詔以發運使兼知泰  
州張綸領韶州刺史將運使司胡令儀遣一官堰內歸業人戶免三年差  
役抗賦督役三班壕寨軍校等遞支賜有差

宋會要 分馬堰

泰州之司馬堰淳化二年二月詔廢

閘

宋會要水關

天聖四年十月楚州北神堰并真州江口南堰各置造水閘先是監稅三槐王乙上言詔轉運司度其事且言其經久利濟者得綱運般剝偷侵住滯故信從之仍遷一秩淳熙六年三月十二日宰執進呈知鎮江府司馬偁言用石修砌潮閘門浚海鰓河使舟船有艤泊之所上曰司馬偁濬河修閘惠利甚廣可除寶文閣待制淳熙十四年九月十一日權知揚州熊飛言揚州一帶運河惟藉瓜洲真州兩閘瀦積今來河水支泄抵緣瓜洲上中二閘久不修治獨潮閘一座轉運提益及本州共行修整然更近江潮水勢衝激易致損壞真州二閘亦

卷一百八十六

修葺本州土樓損漏乞下淮南轉運司淮東提監司疾  
速同共修理仍乞下真州日下修葺本州上下二閘以  
防走泄徒之

宋會要 保安閘

乾道五年二月八日權發遣臨安府周宗言竊見浙江  
舊有渾水清永保安三閘歲久損壞已行條治今欲專  
差官一員充監閘常令管轄閘兵依時啓閉并不住打  
淘河道免致湮塞使公私舟船無留滯之患乞先從本  
府于大小使臣內有材力幹官選擇從之

宋會要 月河閘

乾道二年六月十一日前權知秀州孫大雅言昨所領

州其境內欲水潦可以無憂而又足以禦旱者莫若修  
閘與斗門以時啓閉之為利也且其地有四湖一曰拓  
湖二曰澱山湖三曰當湖四曰陳湖其東南則拓湖自  
金山浦小官浦入于海其西南則澱山湖自蘆港浦入  
于海西北則陳湖自大姚港朱里浦入于吳松江其南  
則當湖自月河南浦口澉浦口亦可達于海支港相貫  
四湖皆通也今若官於諸港浦分作閘或斗門度時啓  
閉不獨可以洩水而旱亦獲利詔委本路漕臣同秀州  
守臣躬往相度措置候農隙興工其後兩浙漕臣姜詵  
秀州守臣鄭聞言合於張涇堰傍高兩岸創築月河置  
閘一所以其兩柱金口基脚並以石造涇內水泛即開閘



以泄之詔令十一月興工 乾道三年三月二十一日  
權兩浙路計度轉運副使姜說言華亭縣新涇招賢涇  
雖有水河泄水不快今相度欲於張涇白茅陳涇新涇  
四處各置一閘遇蘇秀湖三州水泛候潮退即開閘以  
殺水勢從之 考證宋隆興甲申八月奉詔漕臣姜說  
奏請於張涇堰增庫為高築月河置閘其上覓巨石兩  
址相距常有四尺深十有八板板尺有一寸以時啓閉  
故賊潮無自而入月河之長三千三百五十有五尺廣  
六尺許克昌為之記

宋會要 洪澤閘

乾道元年三月十八日淮南路轉運判官韓元龍言催

督修整洪澤兩閘自三月初四日興工至十二日畢詔  
修開官兵令總領所等第犒設

宋會要堰閘

乾道三年四月二十四日兩浙漕臣美說言常州無錫  
縣以北五瀉堰通徹江陰軍等處其堰有閘一重承前  
除網運及重船開閘通放外餘舟止車堰後以無錫利  
於拘稅恐車堰走失即將舊堰掘斷自收掌開鑰不以  
大小空重舟船並閘內通放致啓閉無時失洩運水閘  
板多浮不相連貼亦不着底水從板罅晝夜流入裏河  
今相度於五瀉堰閘裏更添開一重并修築元堰依舊  
車打小料舟船詔本州措置

宗會要 呂城閘

慶元五年正月十九日兩浙轉運浙西提舉司言以知鎮江府萬鍾乞於呂城做臨安嘉興二閘之制添置一閘兩司委官相視鎮江府地形高峻東至常州運河處遷就下海遇水漲河流湍急呂城兩閘歲久損壞令若依做三閘之制本府自備工役添造一閘則隄防周備可保無虞但今來呂城兩閘既已損壞若不先行修整雖有新建上閘亦難獨當上流欲乞下本府將呂城兩閘重行修葺候畢上日却從本府從長措置接續添造新閘庶得利便從之

宗會要 斗門閘

宋會要 斗門開

孝宗皇帝隆興二年二月十三日知紹興府吳芾言昨  
條奏吳修會稽山陰縣鑑湖全藉斗門堰開蓄水都泗  
堰開尤為要言言凡遇綱運及監司使命舟船經過堰  
兵避免車打必欲開開通放以致啓閉無時失泄湖水  
俸訪都泗堰因高麗使往來宣和間方置開今乞廢罷  
從之 淳熙五年十二月二十二日提舉廣南路常平  
茶鹽司言昨來所開濟川河口初置斗門一座候春夏  
間江潮稍大以時啓閉通放至運河則監綱往來無淺  
涸之患從之 淳熙十二年三月二十八日淮南轉運  
司言和州守臣乞於千秋澗置斗門以防麻澧湖水洩

入江遇歲旱灌溉民田實為利便從之 淳熙十四年  
四月四日知太平州張子顏言本州管下圩田除繁昌  
縣並是私圩江湖隔遠外所是當塗蕪湖兩縣諸圩當  
塗受水特甚至於斗門水函多以竹木為之間用磚石  
往往不牢致有損壞今當塗縣重新改造斗門一十三  
所石卷砌四所水函八所修砌舊條礮石斗門五所水  
函一十所蕪湖縣重新改造斗門八所用礮石卷砌今  
後每歲冬間農隙之時先次增修大埂今來具修內埂  
二十段共長三萬二千三百八十二丈計一百七十九  
里一百六十二丈並已了畢詔令守臣以時檢察務為  
久遠之利

宋會要通江橋閘

淳熙二年十二月十六日臨安府言欲於通江橋用石砌疊置立閘板遏河水乾涸啓板通放潮水入河繼行下板固護水勢

宋會要栲栳閘

乾道元年正月十七日知鎮江府方滋言奉訪子城居民水患祗緣近來栲栳閘城下放水道通澈裏澳當時務蓄水灌栲栳閘免泄運水今裏澳刑勢低下放水不入事既無益每因水漲入城反為民患又奉訪古西夾城裏教場城下有水澳池一處停蓄子城內水向北有古溝一所於利涉門城下置水壩一座通澈大江每遇

水滿通放澳水出城以是居民少罹水患今相度於向西城下水隄子城外添置閘閘斷使運河水不入子城裏澳久遠為便從之

宋會要 常豐閘

淳熙十一年六月八日又言台州黃巖縣之東地名東浦紹興中開鑿建置常豐一閘名為決水入江其實縣道欲令舟船取徑通過每船納錢以充官費一日兩潮一潮一淤纔遇旱乾更無灌溉之備已將上件常豐閘築為平陸遂故基乞下本縣自今永不得開鑿入江湖庶絕後患從之

宋會要 黃巖縣閘

淳熙十一年十一月二十六日浙東提舉勾昌泰言台州黃巖縣舊有官河自縣前至溫頭崩凡九十里其支流九百三十六所皆以溉田元有五閘久廢不修今相度其河有合閘三十一萬九千又有竒一面開淘兩月可畢惟有建閘一事約費二萬餘緡乞從朝廷給降詔下兩浙轉運司從本司取的實合用錢數於本司所得窠名錢內取撥應副施行十二年四月二日宰執進呈昌泰再上言漕司不應副錢乞度牒二十道上曰此乃百姓水利可與度牒二十道今浙東提舉司每道作七百貫出賣揆本司合支用錢數應副修具候了畢閘開淘及修建去處并灌溉田畝數目開其聞奏



渠

全唐文

宋會要

祥符七年六月知永興陳堯叟導龍首渠入城民便之  
詔嘉獎

全唐文

水會要

天聖四年閏五月陝府西轉運使王傳文等言準初相  
度到石班殿直劉達奏乞開治解州安邑縣至白家場  
永豐渠行舟運鹽經久不至勞民其開脩檢計工料別  
具奏陳次乞選差使臣一員勾當開脩候其功成望賜  
酬獎按此渠自後魏正始二年都水校尉元清引平坑  
水西入黃河以運鹽故號永豐渠周齊之間渠遂廢絕  
隋大業中都水監姚暹決堰瀆渠自陝郊西入解縣民  
賴其利及唐末至五代亂離迄今湮沒水甚淺涸舟楫  
不行詔三司相度以聞先是解州般鹽帖頭麻處厚等

詣闕訴稱般鹽陪用家貲並盡乞別行相度故有是奏  
從之甚利於公私也

宋會要

淳熙七年六月三十日知臨安府吳淵言萬松嶺兩傍古渠多被權勢及百司公吏之家起造屋宇侵占及內西寨前石橋并海眼緣渠道堙塞積久淤填兼都亭驛橋南北河道緣居民多將糞土瓦礫拋颺河內以致填塞流水不通今欲分委兩通判監督地分廂巡逐時點檢鈐束不許人戶仍前將糞土等拋颺河渠內及侵占去處任滿批書水流淤塞從本府將所委通判及地分節監保明申尚書省各減一年磨勘如有違戾去處各展一年從之

宋會要

淳熙八年九月二十八日知襄陽府郭杲言本府有木渠可溉田數千頃堙塞乞以開修從之

斗門

全唐文

宋會要

仁宗天聖四年二月侍御史方慎言杭州元有江岸斗門二凡舟船出入一則溫台路一則衢婺路其北岸斗門為潮水所壞因循不修今兩路舟船併在一岸偪見不便蓋斗門啓閉有時須候潮平方開因茲住滯欲望後創二斗門詔本州疾速修創勿令住滯舟楫

宋會要

神宗熙寧二年七月京西轉運司言乞差官檢視鄭州榮澤界魏樓村斗門地形高下相度經久利害命監察御史秉行張戩館閣校勘顧臨定奪戩等言魏村斗門

委實利便詔都水監施行

全唐文

乾道會要

壽皇聖帝乾道七年二月四日觀文殿大學士知紹興府蔣芾言本府會稽縣德政鄉古有二浦一名兆浦在上流凡五里餘舊有斗門以障外水一名後浦在下流凡十里餘舊來深浚以泄裏水爰自堙塞久不修治今欲商度開浦并置斗門從之十一月十二日皇子判寧國府魏王愷言化成惠民兩圩周圍已置立斗門共二十四所兩旁用石築壘及以沙板安閘高築土鉗常加堅實及斗門迺年專輪圩戶四名防守臣欲行下宣城縣令佐今後遇圩內積水深長外河水低於斗門即



仰守圩人戶申官躬親先次集衆開斗門出入候畢即  
依舊安閘築塞及常切禁止圩民不得盜決堤岸犯者  
依法施行從之